



Komunikadu Imprensa

01 Jullu 2021

Parlamentu Nasionál

Parlamentu no Governu la fó prioridade ba kria medida lejizlativa hodi asegura ezersísiu direitu polítiku ema ho defisiénsia iha Lei Eleitorál ba Presidente Repúblika

JSMP preokupa no lamenta desizaun Parlamentu no Governu nian ne'e

Parlamentu Nasionál (PN) iha 28 Juñu 2021 halo aprovasaun finál globál ba Proposta Lei Nú. 30/V (3ª) Alterasaun Daneen ba Lei Nú.7/2006, 28 Dezembru kona-ba Lei Eleitorál Presidente Repúblika inklui Alterasaun ba Lei Nú.5/2006, 28 Dezembru kona-ba Órgaun Administrsaun Eleitorál no Alterasaun dahuluk ba Lei Nú.6/2016, 25 Maiu kona-ba Lei Resensiamentu Eleitorál.

Proposta alterasaun sira mai husi Governu inklui iha Artigu 38 Lei Nú. 7/2006 provizaun ida kona-ba prodús modelu buletin votu “braille” ba eleitór ema ho defisiénsia matan atu bele ezerse ho di'ak sira nia direitu ba votu. Proposta ne'e deputadu sira elimina tiha iha votasaun iha especialidade nian. Alende ne'e, iha proposta alterasaun sira ne'e, tantu husi Governu nune'e mós PN, laiha provizaun ruma kona-ba oinsa bele harii estasaun votu ne'ebé ho kondisaun no facilidade ne'ebé seguru no favorável ba eleitór ema ho defisiénsia sira atu bele ezerse ho di'ak liutan sira-nia direitu política ba vota nian.

“JSMP lamenta ho desizaun Governu no PN ne'ebé la inklui iha proposta alterasaun medida lejizlativa sira ne'ebé bele asegura kondisaun no facilidade sira favorável ba eleitór ema ho defisiénsia sira atu bele ezerse ho di'ak sira-nia direitu no poder polítiku nu'udar povu, hanesan vota ho livre, direta, iguál no sekretu tuir provizaun Artigu 7 K-RDTL no ema hothotu goza direitu ne'ebé hanesan no la bele hetan diskriminasaun tanba de'it kondisaun fízika hanesan prevee iha provizaun Artigu 16 K-RDTL. Provizaun Artigu 21 K-RDTL prevee espesifikamente katak ema ho defisiénsia sira iha direitu hanesan ho ema sira seluk no Estadu iha obrigasaun atu proteje no promove sira-nia direitu sira. Nune'e, Estadu iha obrigasaun atu kria medida lejizlativa ne'ebé apropriadu hodi bele realiza direitu fundamentál sira ne'ebé tama iha categoria norma pragmátika”, dehan Diretora Ezekutiva JSMP, Ana Paula Marçal.

JSMP mós rekomenda ba Presidente Repúblika atu tau mós antesaun ba asuntu ne'ebé JSMP kestiona ne'e antes halo promulgasaun ba lei refere hodi husu filafali

Governu no PN atu hadi'a hodi inklui provizaun sira ne'ebé bele asegura ezersísiu direitu polítiku ema ho defisiénsia sira iha eleisaun.

Artigu sira ne'ebé presiza hadi'a, tuir JSMP nia hanoin mak provizaun Artigu 31 Lei Nú. 7/2006 kona-ba sentru votasaun ne'ebé tenke inklui mós rekezitu balun ligadu ho instalasaun sentru votasaun no estasaun votu sira ne'ebé tenke iha kondisaun no facilidade ne'ebé favorável ba ema ho defisiénsia sira hodi bele asesu ho livremente bainhira ba vota.

Alende ne'e, presiza mós altera provizaun Artigu 38 kona-ba buletin votu sira tenke inklui mós buletin votu *Braille* ba ema ho defisiénsia matan sira ne'ebé disponivel iha sentru votasaun hotu atu nune'e sira bele vota ho livre vontade, direta no sekreta.

Tuir dadus husi sensu tinan 2015, número total ema ho defisiénsia iha Timor-Leste ne'ebé rejistadu hamutuk rihun 38,118 liu no entre número ida ne'e total ema ho defisiénsia matan hamutuk rihun 14,828.

Iha JSMP nia observasaun, proposta alterasaun lei tolu ne'e Komisaun A PN finaliza iha nia diskusaun espesialidade iha 23-25 Juñu 2021 iha Aileu ho partisipasaun husi Governu nu'udar proponente ba proposta ne'e mak Ministériu Administrasaun Estatal no Ordenamentu Teritóriu no hetan mós partisipsaun husi representante CNE no STAE hodi fó sira-nia opiniaun sira relasiona ho proposta alterasaun sira ne'ebé Governu propoin inklui proposta adisionál sira ne'ebé deputadu sira propoin atu adita durante diskusaun espesialidade.

Aprovasaun proposta alterasaun ba lei tolu ne'e pasa iha votasaun final global iha Parlamentu Nasionál ho votu unanimidade husi total deputadu ne'ebé marka prezensa iha votasaun hamutuk nai'n 62.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Website: <http://jsmp.tl>
www.jsmp.tl

Rua Beco Lakateu, Aldeia Manufuik,
SukuColmera, Administrativu Vera Cruz
Dili Timor Leste
PoBox: 275
Telefone: 3323883 | 77040735
www.jsmp.tl
ana@jsmp.tl
Facebook: www.facebook.com/timorleste.jsmp
Twitter: @JSMPtl